

Hiesdunak laguntzeko ARSA zentroak gaur zabalduko dizkio ateak publikoari

Sidaction operazioa dela kari, diru laguntzak erdiesteko premia azaldu du taldeak

Hirugarren aldikotz, Sidaction izeneko operazioa zabalduko da Frantzia-ko kate publikoko pantailetan, egun osoan. Ekimenaren helburua izanen da dirua bil-tzea hiesari buruzko ikerkuntza eta elkarteak laguntzeko. ARSA Miarritzeko elkarteak goraipatu du ekimenaren garrantzia.

Lutxi Fourcade / Miarritze

TELETHON operazioa sortu zen bezala duela hamar urte, Sidaction hitzordua sortu zen Frantzia-ko telebistako kate publikoetan duela bi urte. Izugarriko komunikazio tresna horri esker, operazioaren bultzatzaileek dei egin nahi zioten ikusleei, elkartasuna adieraz zezaten. Hiesari buruzko informazioak emateaz gain, Frantzia guztian diru bilketa zabala antolatzea finkatu zuten helburutzat. Izan ere, Gobernuaren eskasari aurre egiteko, eritasunaren aurkako ikerkuntzen finantzamendua nonbait erdietsi behar zela azpimarratu zuten operazioaren bultzatzaileek. Lehen hitzorduak gaitzeko arrakasta ukan zuen, eta 240 milioi libe-ra (6.000 milioi pezeta) bildu ziren gau batez estatu osoan. Bigarren ekimena, berriz, nahiko gaizki iragan zen, eta jende gutxi-k parte hartu zuen.

Sidactionen hirugarren hitzordua iraganen da arrats honetan, eta urteko une garrantzitsua izanen da Miarritzeko ARSA Akita-niako Bergizarteratzeko Laguntza taldearentzat. Hain zuzen ere, duela lau urte sortutako elkarte horrek premiazkotzat jo zuen Sidaction ekimenak emandako diru laguntza. «Gizarte laguntzak er-



ARSA zentroko ordezkariak, atzoko agerraldian.

BOB EDMÉ

diesten ditugu, baina gastuak askoz handiagoak dira», azpimarratu zuen Jean-Pierre Jacouty-Juncak, zentroko koordinatzaileak. Izan ere, bi milioi liberako aurrekontua du elkarteak, eta kanpoko diru laguntzaren beharra du egitura zutik altxatzeko. Operazioaren garrantzia aldarrikatzeko, zentroko kideek informazio mahaia izanen dute goiz osoan Miarritzen, eta Ate irekiak operazioa egingen dute arratsaldean. «Aukera paregabea izanen da gure lanaren berri emateko eta informazioak zabaltzeko», gehitu zuen.

Multiterapiaren ondorioak eguneroko bizitzan • ARSA zentroa sortu zen Miarritzen duela lau urte, hiesdunak laguntzeko. Garai hartan, eritasunaren trata-

mentua eraginkortasun handirik gabekoa zen. Zentroko arduradunen lan handiena zen pazienteen arazo praktikoak konpontzea eta laguntzea ematea heriotza iritsi arte. «Jende ugari pasatu da zentrotik, eta, zoritxarrez, adiskide franko galdu dugu», oroitu zuen Jacouty-Juncak. Gaixoen bizi-baldintzak hobetzeko, bizi-zentro bat ireki zuten hiri erdian, 1994ko apirilean. Grace izeneko etxeari esker, aterpea eta janaria eskaintzen zieten zailtasunak zituzten gaixoei. Ekimena arrakastatsua izan da, eta 1994tik goiti 30 bat lagunek baliatu dute zerbitzua.

Hiesaren tratamendu aldaketaren ondorioz, ARSA zentroak beste aktibitate batzuk abiatu ditu. «Terapia anitzekoari esker, hiesdunen bizi-itxaropena luzatu

egin da. Proiektuak egiteko aukera dute, baina bergizarteratzeko zailtasun izugarriak dituzte», azpimarratu zuen Labadillek, zentroko medikuak. Arazo berri horri buru egiteko, ARSA zentroak Bi eskuz tailerra sortu du Miarritzen, 1996an. Arratsalde guziz, hamar bat lagun biltzen dira eskulanaak egiteko, baita eguneroko arazoez mintzatzeko ere giza laguntzaileekin. Bestalde, zentroak indar bereziak egingen ditu gaixoak beren etxeetan atxikitze. «Tratamendu berria jarrai dezake ospitaletik kanpo, eta aholkuak eta laguntza praktikoak ematen ditugu etxean egoteko», gehitu zuen Labadillek. Egun, hamabost lagunek lan egingen dute ARSAn, eta beste 25 laguntzailek parte hartzen dute laneko ordutik kanpo. X

IAk salaketa judiziala aurkeztuko du NUPen aurka

■ Euskaldunen eskubideak ez errespetatzea leporatzen dio

Juan Kruz Lakasta / Iruñea

IKASLE ABERTZALEAK (IA) taldeak Nafarroako Unibertsitate Publikoaren (NUP) aurkako salaketa judiziala aurkeztuko du, ez dituelako errespetatzen euskaldunen eskubideak eta ez duelako betetzen unibertsitateko estatutuak 106.1 artikulua. Artikulu horren arabera, «unibertsitateak halaber euskara eta gaztelania erabili behar ditu».

Ikasle Abertzaleek atzo salaketaren berri emateko egin prentsaurrekoan azaldu zuten, NUPek ez du artikuluko puntu bakar bat ere betetzen.

IAko ordezkari Ainara Armendarizek atzoko prentsaurrekoan azaldu zuen bide judizialari ekin aurretik gaituzteko bide guztiak agortu dituztela: «Instantziak egin ditugu, egoera salatu dugu Klaustroan zein Gobernu Batzordean eta errektoretza taldearekin hitz egin dugu. Errektoretza taldeak erantzun bakarra eman du: isiltasuna».

NUPen Eguna • IAKo ordezkariak Arrosadiako Sario eraikinaren aitzinean egin zuten agerraldia. Aldi berean, eraikinaren barruan NUPen Eguna ospatzen ari ziren. Unibertsitateko ordezkariak ezezik, ekitaldian izan ziren Nafarroako mandatari politikoak eta militarrek. Ospakizun ekitaldian baitan, Nafarroako Parlamentuko presidentea Lola Eguren NUPeko urrezko domina jaso zuen. X

AEKren 'Ele' aldizkariak egitura berria du

■ Koordinakundeak kurikulum berriaz egingen duen balorazioa jasotzen du

Gorane Agirre / Bilbo

ALFABETATZE Euskalduntze Koordinakundearen (AEK) Ele aldizkariak egitura berria du bere azken zenbakian. Horrela, 18. zenbaki horretatik aurrera artikulak zortzi sailetan banatuak argitaratuko dira: Glotodidaktika-teknikak, Esperientziak, Ikerketa lanak eta Soziolinguistika-Euskal mundua sailak izango ditu.

Datorren astetik liburu dendetan salgai izango den azken ale horretan 11 artikulua aurki daitezke. Horietako batean, Imanol Esnaolak, gazte euskaldunen hizkera aztertzen hainbat urte daramatzan adituak, helduen euskalduntze-alfabetatzerako zenbait irakaspe proposatzen ditu. Ikerketa lanak izenburuko

saillean ageri den artikulua horretaz gain, Ikas prozesuaren azterketaren lehenengo emaitzak lana ere aurki daiteke.

Horiekin batera, 18. zenbaki horretako beste artikulua nagusi-netako bat Kurrikuluaren gaineko hausnarketa da. Lan horretan, AEK-ko Didaktika Batzordeak HABEk helduen euskalduntze eta alfabetatzerako diseinatu duen kurikulum berriari buruzko balorazioa egingen du.

Aldizkariaren zenbaki berrian aurki daitezkeen beste artikulua batzue honako hauek dira: Mari Karmen Menika eta Mikel Aizpuren UEUren historia eta oraina, Gontzal Lopez-ek landutako Euskalkietatik batura: handia egingen dugun pausu txikia edota Arantxa Ugartetxeak Freireren alfabetatze metodoaz egindako lana.

Helduen euskalduntze eta alfabetatzean lanean diharduten lagun ororentzat Ele aldizkaria dagoeneko erreferentzia bat dela eta gaur egun finkatze prozesuan murgildua dagoela adierazi zuen Tito Serranok, argitalpenaren koordinatzaileak.

Duela 12 urte kaleratu zen Ele aldizkariaren xede nagusia bigarren hizkuntzen irakaskuntzan egon daitezkeen esperientzien trukaketen zein eztabaiden gune izatea dela gogorarazi zuen Erramun Osak, Bizkaiko AEKko arduradunak. «Ele-k pizgarri izan nahi du, izan ere, hezkuntza arloa eta helduen heziketa horren faltan baitaude; heziketan zerbait aurreratu nahi badugu eztabaida ezinbestekoa da», adierazi zuen AEK-ko Bizkaiko arduradunak. X



Erramun Osa, aurre-aurrian, Ele aldizkari berriaren aurkezpenean.

MIKEL MARTINEZ